

四庫全書

集部

欽定四庫全書

集部

東田遺稿卷上

詳校官中書臣沈 颺

中書臣劉源溥覆勘

總校官編修臣王燕緒

校對官學正臣常 循

謄錄監生臣鄧以伊

欽定四庫全書

集部六

東田遺稿

別集類五

明

提要

臣等謹案東田遺稿二卷明張羽撰羽字鳳舉奉興人弘治丙辰進士官至河南左布政使是集詩文各一卷為其季子楨所編門人儲洵序之羽為御史抗疏劾劉瑾直聲震朝野文雖不多其方正之概凜然見于行間詩

亦規摹盛唐不落纖巧之習蓋弘治正德之間去明初前輩猶為未遠流風餘韻往往而在而羽之澹靜峭直又出天性雖其博大富健不及李東陽程敏政排奐鉅麗亦不及李夢陽諸人而不為舊調之庸廓亦不為新聲之塗飾肖心而出務達所見而止在明作者中可以自為一隊矣乾隆四十六年十月恭校上

總纂官臣紀昀臣陸錫熊臣孫士毅

總校官臣陸費墀



東田遺稿序

君子消長之道值其時而文隨之時進而章明勃乎蒸雲以利以澤時卷而懷則儼乎崇山逸氣上濟望者仰而誦之非道之異也國朝弘正之間籍顯地以雅實自任而能振拔士類如西涯李公篁墩程公海內舉稱文宗于時列曹署如我文懿公白巖虎谷九峰二泉諸公彬彬郁郁皆文行豪特之選東田先生始釋褐至京師一日以文名遂揖公卿席賓敬若古歐蘇學士云者故

暇則游從談燕以詠以奕夜寒刻燭不覺漏曙別則爭  
賦詩飲餞卷聯愛直慷慨閱議升車而行搢紳偉之先  
生長身玉哲廉潔清方神秀穎發博聞強志不取合於  
流俗真翩翩振鷺也始令淳安讀鐵翁去思碑仁愛好  
教化以寬平稱良晉內臺伸威提法風裁徵明不為利  
疚不以勢詘讀地震開礦取燈諸疏危苦激切嚴聽敢  
毅表坐正人照彼佞者吁不得盡其極也當衡忌補掖  
郡保定賸左禡齧城之狐視先生敬憚之三月無敢撓



治讀孫司徒九峯書悲其志連章乞歸再薦起貳藩臬  
踰年歸亟薦正左轄不決時歸讀其言曰朝廷以廉退  
用臣臣敢不以名節自愛夫自愛以節三仕而三已進  
退之道抑時也哉先生曠遠峭直得一善則盱衡擊節  
黃見眉端即非其意雖籠富貴分糜爵奚啻傷損晚休  
東田偕其弟北渚先生高情旁薄周流情理之間無溢  
言曼辭以為侈大無病畦厲色以資調訥勁特而不能  
屈已寡儔而罕於曲應咏歌先王之澤滋暢正始之宗

讀其詩琅琅有遺音矣嗚乎高山大川不田不舟水土  
所珍以先生砥行而未大行以濟命也夫先生季子楨  
收次遺編從弟刻之家授簡命洵夫玄之秘芭習之韓  
之文漢叙之先生可得而聞者洵愚瞽然媿其能辭先  
生諱羽字鳳舉位望行歷載南溪中丞誌中洵特論其  
世繫哭門之恩云爾嘉靖癸卯夏四月望賜進士第奉  
政大夫福建提刑按察司僉事前兵部郎中門人儲洵  
拜書

欽定四庫全書

東田遺稿卷上

明 張羽 撰

詩

早朝偶作

丙辰春登第後二弟鵬  
舉下第南歸因懷之

曙色初臨五鳳城  
建章宮外聽啼鶯  
紅依御水桃花淨  
綠壓宮牆柳葉生  
退食從容當日午  
趨朝遲暮自天明  
潞河南下歸舟急  
不盡池塘春草情

奉贈柴墟儲公

儒雅當年定可師，相留一醉亦心期。  
宦情多暇詩頻擬，秋興堪悲菊未知。  
病喜家兒能檢藥，靜憐簷鳥不驚基。  
身應萬仞青雲上，滄海明珠幾注思。

贈冒武昌南還

五十巖廊定不遲，黑頭郡節亦相宜。  
玉除曉日瞻龍袞，江夏春風廢繭絲。  
門士無書通薦藁，野人有祀到生祠。  
歸舟千里衡湘水，明月清秋總入詩。

奉贈胡少參先生督餉陝藩

霽色望秦山春雲過渭川辛勤憐去國老大獨籌邊相  
國功重問司農位久懸清江留舊業此意亦蕭然

任城太白樓

山城煙柳護春寒太白樓前送曉看故塚生愁虛采石  
舊恩和醉對金鑾登臨有興妨多病流落難逢笑冗官  
莫信江湖輕遠適憑高我亦望長安

邵伯湖寄柴墟先生

湖口餘寒駐客舟  
鄉園猶是數程留  
短檠遲拆悲今雨  
丹闕青雲感舊游  
飛鵠正酣雲外路  
浴鷗猶眷水中洲  
當時萬卷空多興  
通籍金閨誤見收

次韵答朱楚英

北來鄉思漫能禁  
寒盡燕方雪正深  
日下啼猿驚泣玉  
眼中流水憶鳴琴  
浮生誤覺邯鄲枕  
緩頰慙多相國金  
明日定堪重獻策  
長沙已動賈生心

三忠祠詩次韻淮陰方太守

諸葛武侯

驅馳曾喜出南陽  
魚水猶懷聚一堂  
拜表宮中無故主  
墜星原上漫垂楊  
三年後死功須定  
百務勞生敵解量  
莫恨馬曹終竊據  
荆徐不得失雲長

岳武穆王

岳王旌幟眼中空  
精爽褒公與鄂公  
萬里山河聞叱咤  
千年廟貌識英雄  
猶看汗馬回生氣  
須到黃龍立戰功  
誰誦辨誣成浩嘆  
兩宮哀怨更難終

文丞相

秋日文山塚樹蒼舊君報死亦尋常  
羣疑未白亡元日萬里猶歸侍帝傍  
東海無家兵已盡南冠不免死猶光  
燕京祠廟靈風急社鼓神鴉滿夕陽

嚴陵曉發次夏嚴州汝梅韵三首

官舟夜並越溪行已判青春付客程  
出嶂漸分嚴瀨曉聽鐘新識建山晴  
東來白雪明江縣北望紅雲擁帝城  
三輔未應愁遠適漢庭須亦試蕭生



承恩誰賦內前行  
遠客來頻識水程  
一鳥波間閑上下  
數峰天外忽陰晴  
山林不解南風曲  
裘馬猶矜北斗城  
莫向春明門外別  
大梁賓客望班生

春陰強作問畊行  
出淖猶堪載酒程  
每厭蜃樓乘海暗  
定知燭火忌天晴  
山陽地濕茅穿逕  
雪後江高水到城  
病怯官忙無暇日  
銅章錯憶綠紋生

送周仲鳴使歸二首次夏嚴州韻

猶是行春隊裏仙  
聞名未勝見時賢  
交從暇日酌知已

飲託雄文紀盛筵出郭圖書留近驛隔江燈火候歸船  
送君便重思前度不道長安遠日邊

使回意氣望中仙曾喜風流入晉賢旌節暫看勤傳舍  
國風猶待獻經筵星辰北極三秋夢冰雪東方萬里船  
遙憶趨朝馱瘦馬珮聲夜過玉河邊

西坡為程正夫賦

石路縣孤墅村居倚夕陽過山窺昧谷望日認扶桑曉  
圃葵榴競秋田稔稔香東坡近為政欲避蓋公堂

贈徐景禹進士

徐郎久別亦何如  
笑共燈前謝起居  
老杜詩多看峽後  
阿蒙賢勝在吳  
初慰言聊致民家語  
病客都忘舉業書  
莫厭相留成坐久  
獨憐遠地故人疎

登石碁枰山

昔聞二僊侶對奕  
此高峰日月推移外  
乾坤勝負中  
冥心孤鳥過撫掌  
四山空應有傍觀者  
猶憐着意工

過柴墟墓

千里江淮秋色闌  
九原松柏晚雲攢  
愁經墓下辭房琯  
誤過州西哭謝安  
宿草自繁承淚遍  
長楊空撫賞音難  
孤舟明發夷陵道  
空對晨星曉月殘

壽何篤齋七袞

壽星卿月照天中  
春曉樓船過永豐  
東閣襟期同汗漫  
南塘風日好從容  
鯉庭玉樹連枝秀  
鸞詒金花奕葉封  
曾共少年矜傅粉  
白頭林下各成翁

贈林生歸嚴陵

生從蔡霞山授春秋余  
與偕至南岩月餘辭去

憐君風格出璠璣二十工文衆不如奏賦定知觀國早  
聞詩曾及過庭初遙隨博望浮靈境頻扣中郎乞異書  
憶得問名猶少小南川堂下揖青裾

閩中九仙觀用李惟正杭世卿二卿長韻二首

尋真初識郭門山二月春深古觀閑仙去碧桃空錯落  
客來黃鳥故間關經樓出堞看潮坐道院迷雲認樹還  
更羨留侯能辟穀只從松子住人寰

荒碣依微認晉唐荔枝榕葉暗迴廊峰霞晚結燒丹氣

澗溜春寒煮石香雲外紫壇穿樹覓林間瑶席拂花張  
夜歸欲假仙游夢只恐靈修各發藏

壽丹山屠都憲先生

三朝爭識舊容儀晚節重恩荷主知分座貂蟬看故吏  
朝天珂馬共佳兒都堂再入人皆仰新法難平迹已危  
憶對南山傾壽酒年年應記菊開時

吳銀臺宅食桃魚云出尚方為作一律

御苑仙桃出絳閨恩波兼飫賜魚芬桃從武帝筵中降

魚是丈王沼內分幾度著花供餽與定看濡沫惜殷勤  
報瑀未足酬珍貺在藻還同祝聖君

弔賈長沙

歲晚長沙路懷賢弔賈生翔鸞秋自遠妖鵬夜還鳴禮  
樂思周旦憂疑過屈平霸陵無日起湘水至今清

玉岡宅同劉松石道長賦海棠用唐人錦瑟詩韻  
二首

梅花零落入新絃蜀海棠猶早占年垂蒂最先迎戲蝶

落紅應不到啼鵲香微賸許呼仙侶艷冷如知避瘴煙  
滇中此花正月盛開為道玉峰春意滿更看桃李共依然

生憎羯鼓雜鳴絃忽對花叢憶去年嬌艷真看如中酒  
返魂應解逐啼鵲湖山靜夜深凭月燈火迴時小障烟  
剛被東風輕喚醒尚饒春睡欲茫然

送劉松石歸黃州

玄都舊逐看花仙憶道重來樹滿千同畏簡書行海外  
劇愁戎馬共燈前

是時滇中傳言官軍逐劇盜劉七自襄湖順江而下

才名避地



應三舍齒序先君漫十年却送歸旌悲故里幾回飛夢  
郭東田

壽孫母太夫人

院君年老髮垂絲健態怡顏似少時霞帔承恩延晚慶  
斑衣迴笑慰重慈謝家玉樹迎春滿王母蟠桃度歲遲  
只與隣姬同甲子賸多賓客頌螽斯

德州道中次北潭先生贈別詩韻

南雁飛時燕已西高林欲靜遠山低流年暗裏看逢酉

歸路秋深喜過齊  
問宿隔隣分火照  
出關隨伴候鷄啼  
病來端覺詩情薄  
懶向郵亭續舊題

次韵送林先生

時名江左薄夷吾  
皦日中天藉手扶  
盛節酬恩盟帶礪  
長生乞藥問蓬壺  
三邊控吏遙迎馬  
五月歸旌忽載途

闕

建溪楊太僕陶園

陶園想見古人情  
采菊看松趣日成  
遺世自禁彭澤醉

為官剛悟馬曹名，僊溪九曲遙穿徑。  
奴橘千頭晚傍城，欲命巾車來入社。  
豫從詩卷訂前盟。

投贈延平歐陽崇道棄官歸廬陵

龍津孤月下城初，荒洞長風拂袖餘。  
閩海去時逢荔子，楚江歸日到鱸魚。  
浮榮屣脫二千石，舊業珍藏六一書。  
猶有郡人懷舊德，

闕

用韻送李懷德進士歸建寧

冬殘歸計屢移旬，漫擁干旌送遠人。  
燕市酬金逢駿馬，

郢歌希和到陽春賓筵欲別情還戀世故相看懶重陳  
却對梅花官舍晚憶君標格恍如真

贈聶鳳山都憲之南贛

薇垣左轄稱循良  
柘府中丞重激揚  
兩月追隨傾洛下  
十年風誼憶滇陽  
涓人駿骨初逢賞  
漂技侯封漫購方  
今日須公如小范  
會應威德靖炎荒

同王龍湫翟青石遊梁園押韻賦詩仍各賦一律  
官閒幾日惜浮生  
弔古尋幽燕集成  
梁苑有基空梵劫

杜鵑如訴答鵑聲

汴人不識鵑聲余始于座上聞之

上方開霽鐘先報

高樹迎秋葉盡驚總為文園愁病在子虛遊望不關情

人日次韻李崆峒

幾日關人事陰風黯鼓輦謀回聞野戰齋卧臣隣啼積雪冥鴻遠輕陽太白低元戎頻送捷有待頌淮西

輓大行吳年兄勿齋

昔從秋宴鹿鳴堂曾共歸舟問北江前輩文章推巨筆  
往時燈火憶同牕二雛風格祥麟並八月星槎畫鷁雙

我憶九原招不起  
紫薇花下獨眉龐

雪中送王一江少叅之廣

好去王公子  
離亭共此杯  
望依鳬舄遠  
興憶雪舟來  
越徼占行色  
梁園惜賦才  
天涯獨寥落  
猶喜暫徘徊

送劉西陂巡洛

劉郎相見晚  
悵別坐天明  
春雪那能急  
泥途不可行  
冥心通紫極  
灑淚對蒼生  
同是看花客  
因君百感并

草堂雪霽為樊雙岩賦

先公昔分閫曾此駐旌旗  
栢府良弓後茅堂肯構時  
原光搖霽雪河響圻春澌  
樂矣南榮曝吾君恐未知

送萬安然歸南昌

黃花落盡亂鴉啼  
聞道仙舟傍晚移  
江邑秋殘驚客久  
故園春在夢歸遲  
馮驩心事無魚鉞  
毛遂才名脫穎錐  
我亦無人識名姓  
對君慵寫送行詩

黃潤夫別號松亭為賦一律

咫尺徂徠有路經  
萬松行裏寄幽亭  
曉寒枯硯研零露

春暖虛窗嗅茯苓石室可招丹鳳下草廬誰喚卧龍醒  
清高我愛黃公子座右新題晚翠銘

使節榮行代儲柴墟作贈焦宗伯分韻開字排律  
瑞日氛煙靜祥春淑氣來蒼龍隨警蹕丹鳳舞蓬萊道  
泰諸靈協仁同一視該履端均朔裔布澤到寒荻玉牒  
分藩盛金滕冊典開眷言懷睦族簡命重掄才宗伯三  
朝舊時名兩制魁誦詩元浩瀚束帶久徘徊染翰終投  
筆和羹待作梅九遷躋鼎鼎三錫賁泉臺詔借皇華節



思看宰木培遺羹翻謝穎建鉞衆多裴野水星槎度沙  
堤畫錦回泌清同照耀嶽峙藉崔嵬鶴壠焚鸞誥龍章  
動蝶灰幣陳中帑綺尊注大官醕湛露霑封草需雲覆  
奠盃寵華詞客賦燕醉里人陪令子休歌棘先公舊植  
槐鄉遊花正好國計驛還催咨度行須徧詩篇定易裁  
歸囊發大雅願擬贊康哉

寄于文祥

十載同書硯于今恨不平青雲未得意白社漫馳情韓

子綦猶焰馮郎缺欲鳴作詩聊寄舊風月助淒清

中秋次柴墟先生韻二絕

卯歲離鄉歷丙辰無端歸計只逡巡長安亦有江門月  
今夜清光冷照人

好懷對客醉佳辰頻教家兒數酒巡欲去且看花上月  
秋光深處易留人

慧河寺留別同鄉金上人

旅懷寥落寓京師山寺逢僧是故知兩月都忘為客日

廿年能記出家時  
夜堂觀奕金蓮盡  
秋閣聞歌玉樹悲  
明日移家定何處  
藤蘿寒月照相思

領淳安紫墟席上留別贈行諸公

長安傾蓋荷先知  
投贈今宵賸有詩  
水國山晴舟去遠  
春明花早燕歸遲  
坐殘曙漏猶高咏  
數過韶華滯去期  
最是玉河堤畔柳  
依依偏向別離時

黃潤夫北山新居

小逕城陰繞薜蘿  
瓦盆相對長高荷  
花深山鳥時還下

地僻儒紳整亦過草色雨亭生畫景爐香秋院引絃歌  
分明蕭散紅塵外未必仙居定若何

九峯北潭二老同日報罷

九峰高凌雲北潭清徹底我遊遍京洛寓目惟有此峰  
高更無隣小草不成美潭清足空洞鑑見衆形穢陰霾  
忽朝暗風浪兼時起衆人恐波及吾心恒仰止楊家侈  
氷山奉高空沼沚雲開潦水盡萬古此流峙

至日寄都下故人二首

冬至山陰煖氣微五更廳事動朝衣  
鷄聲衙吏來應早  
雁足鄉書到亦稀  
天上星辰雙闕迴  
江邊冰雪寸心違  
寓游正憶窮愁日  
薄晚東齋坐不歸

至日今年更越西  
京華遙望眼先迷  
朝衣待曙悲新約  
唵燭爭寒憶舊題  
簷外冰霜愁自瘳  
山陽煙霧喜同隳  
宦途未暇滄洲遠  
何處浮雲不定棲

元夜奉次篁墩先生韻

今雨相逢是上元  
一樽殘漏未辭煩  
醉眸歸送鰲山盡

離思春憎錦瑟繁  
北斗高居縣夜直  
南山孤興倚秋園  
十年曾是西莊舊  
圖卷依稀憶贈言

春雨

輕風遲遲折春夜  
苦復長脈脈夜來雨  
如縷縈羈腸撫  
卷不成讀篝燈爛餘光  
渺矣望故園帝鄉復何方  
伊昔年少心屢脫  
聲利場紛如睦下吏  
晨莫徒皇皇佳遊劇  
遐想吏隱良參商  
拊心媿江雲濯足悲滄浪  
既乖齊竽調徒抱荆璞傷  
侯封亦漂技千金購奇方  
西燕正低掠

北鴻翩迴翔物候轉目新塵顏非故常駕言阻歸牽昨  
夢勞悠揚懷哉紫荊樹連枝發幽芳况茲饑饉餘祿食  
慚頽魴明朝一雨霽南陌行春桑

宮怨

清秋宮月照牕紗重捲珠簾望翠華咫尺昭陽恩不到  
鏡中容貌枉如花

贈徐生

徐郎二八能文字暫負秋期已恨遲可愧嚴陵江上客

功名三十少人知

次韻答莊貳教志明

喜君儒雅可吾師  
燕集山堂幾訂期  
盛際雲龍非偶事  
閒情花鳥是深知  
才華自愧山公啟  
靜鎮猶懷謝傅碁  
淮海十年多舊侶  
蒹葭秋水正興思

疊韻

春歸溪口訊舟師  
猶悔鄉園負宿期  
臨事我慙程不識  
閱人誰是魏無知  
聞笳欲下清宵淚  
折屐虛懷勝日碁



莫任江湖輕浪迹食芹曾切尚方思

哀田家口號

三月連陰四月過桑田無利有催科行人莫訝深山虎  
一入城中虎更多

端午

五月江村歸夢長又從客裏過端陽石榴輕閃風前色  
山艾時飄苑外香競水數舟那更急穿花雙蝶故多忙  
兒童不省官中好猶插朱符說故鄉

病中口號

三十功名媿獨難  
祇將多病付仙丹  
千金市駿應誰是  
萬卷焚魚正自寬  
綠野雲閒秋稻熟  
青溪月淡夜魚寒  
遲歸已負滄洲約  
便信輕舟下急灘

嚴陵晚泊東同遊諸公

客懷何處寄秋城  
欲與長沙弔屈平  
江上逢人皆社約  
舟中見樹問山名  
煙波日靜魚龍晚  
霜月天高杞菊清  
暫共建昌祠下泊  
上方鐘磬夜分明

淮口擬別三弟文舉兼寄諸弟

淮陰去路爾歸程欲寫愁心寄遠征雲塞忽分聯雁影  
泥途未出跛驢行三年去國身先病幾日思家夢亦驚  
傳與青春諸玉季辛勤三十媿為兄

示楷

憶從春燕共羣英鄉國虛傳甲第名千里冰霜心盡赤  
幾人萍水眼偏青他鄉得病悲妻子薄宦歸家笑弟兄  
誰判憂虞需富貴祇應江海老浮生

早春行下邳

青草山前雨未晞東風初解試春衣  
過淮柳短鶯遲語連海沙長雁欲歸  
舴艋雲中河水綠鞦韆畫裏女裳緋  
行人正漫西江興到處風光賞更違

晚春舟中

風光二月成虛擲客路三千鎮獨歸  
去國漫憐行日遠到家常恐見花稀  
燈穿夜舫春蟲入帆過晴沙宿鷺飛  
零落當時多少事東風江上欲沾衣

嚴州天寧寺

水南石上天寧寺春盡移舟偶自登煙樹霧花猶病眼  
洞雲崖月獨閒僧樓高百里山皆出江近諸川瀉欲騰  
誰許宦遊誇勝覽鳳城宮闕百憂并

茅亭

思君千里問茅亭忙裏還能幾日登花重雕闌晴幕啟  
香凝磐石午琴鳴醉翁喜雨應陳迹放鶴沉香漫有名  
曾是檢書當夜坐會逢藜火訪更生

題莊志明邑博扇面小景

猶憶西池畔蓮開七月紅  
波明魚度藻莎碧鷺依叢客  
舍秋天外花期病眼中  
莫愁歸日晚正是剝青蓮

喜張邑博振卿生子麟兒短絕以志

星樓歌鼓動新秋  
傳喜麟兒誕月周  
我亦二郎如阿仲  
與君相對醉江頭

秋興同商進士景貞押韻作

離家秋晚自初春  
九辨年來入賦頻  
病久漸能知藥性

途窮端欲問錢神詩懷似媚江花淡旅食全甘海味新  
莫訝偷閒成夜醉定須疎散是吾真

花期曾負曲江春搖落秋芳寄興頻蟋蟀生愁渾寂莫  
芙蓉何意更風神江邊病客終違俗河內凶年媿食新  
閒道蛾眉當北去漢家物色恐亡真

露下江籬綠似春寒潮西去打城頻青山舊鎖吳宮恨  
白浪疑歸胥廟神返照迴鴉楸葉淨孤舟聞雁荻花新  
玉簫明月成追憶歸夢紛紛記未真

花柳曾沾輦路春登高誰賦黍離頻峽雲虛綰巫蛾髻  
湘水能傳屈子神萬里九重天闕遠千金一笑主恩新  
三郎亦自慚韋武猶有傍人笑太真

御苑離宮不耐春夕陽詞客放歌頻當時漫意禪梁父  
何處宸遊訪洛神近侍寵多賓客盛腐儒憂在鬢毛新  
秋來亦有休文瘦欲倩傍人為寫真

宵行

嵐氣薄征旗溪風振弱漸翻鴉驚葉響吠犬覺花移村



靜看燈近山深見月遲秋空蕭瑟在此景與心宜

宿嚴州西觀次韻贈別周仲鳴水部

才名曾喜動堯庭見領恩光賦出城幾日鄉音投客話  
九秋三館惜離情整遲歸棹須明發定過前灘憶夜聽  
為有吳山堪寄遠侯郎知亦盛詩聲

除夕同張振卿押韻作數絕

官忙剛得夜深眠除夕它鄉更惘然貧病謾憐猶故態  
兒童浪說慶新年

曾聽朝鷄警獨眠  
午門燈火夜森然  
一官此日天涯外  
遠効華封祝萬年

江閣疎鐘惱客眠  
俸錢沽酒醉陶然  
明朝況是正元節  
百歲浮生又一年

休沐寒宵正穩眠  
疎遲贏得髮黧然  
黃楊已受春功薄  
猶恐明朝值閏年

嚴州新春用林南川郡博韻

春到無多日  
孤舟細雨來  
近郊微見麥  
隔水忽看梅  
凍

雪宵燈約殘更曉角催新年猶旅食未試豹燒胎

嚴陵舟中值雪次林緝熙韻

雪花交白日又共守庚申興助乘舟客愁添失路人隴  
梅猶遲煖塞草未知春村酒溫新火長年語自親

咏雪次洪克明邑博韻

春寒漸勁此舟中陣陣氷花度幕風野積遙看千逕合  
岸深只放一溪通平添新漲時兼雨寄綴高枝亦藉風  
小泛會應乘暇日幾人幽興得相同

贈應文昭耆士

六十青溪士迂疎白髮生  
舊家餘故老薄俗畏仁聲  
手種花都活爐燒藥亦靈  
里中推月旦猶不後諸兄

題何大淵藏呂迂振畫雁

金風力弧矢射獵紛健兒  
驚飛天南鄉悠悠定何之  
南人苦相求設四橫中陂  
稻梁非所謀網羅不可麗  
瀟湘在何處夕月虛寒枝  
安如圖南鳥一徙棲天池  
翩翩上林間北海還縲羈  
長門度深夜屬我千金詞  
歸飛背江

燕春秋以為期獨坐鼓瑤瑟會向柱行歌

畫鷹

田車不踏菟蒐驚鳥何勞送澤宮知是漢皇仁鳥獸  
虞人解自慎繚籠

縣令羅公初導新河邀與小泛因呈同遊諸公寓  
規勸之意得詩八絕

日晚僊舟出遠林南風時共解煩襟行人要識蒙恩澤  
得與新河流水深

官河晴雨紀巡遊茂宰新懷洛水憂猶有懽聲傳道里  
城中下令緩征求

右呈羅尹

海榴花過綠成林試折殘枝露濕襟莫惜飄紅低著地  
玉顏正少主恩深

農時得共問畊遊只有村翁不識憂為語城中官府好  
近來惡吏不需求

右呈楊丞

楊有政譽

官舟簫鼓競遙林倚醉波間一散襟  
九夏風光千日酒  
君恩翻覺暇中深

齋休詩健足清遊玉食還同佐邑憂  
今日民愁公賦急  
晚絲新穀不勝求

右呈蕭簿

蕭時  
董賦

晚潮新漲下西林小泛回時月滿襟  
昨日市墟多巨浪  
使君莫較酒盃深

天閑八駿憶周遊誰解千金破主憂  
定是龍媒能萬里

涓人駿骨亦先求

右呈靳簿

靳時  
司牧

贈別陳百一

君從西州來未至動消息長步登我門顧笑一為揖江  
湖謝鄉音傾蓋如舊識殷勤寄雙魚為云柴墟客劍頭  
挂一書種種青囊錄江山覽奇勝窮海遍踪跡談玄出  
造化潛悟豈龜卜燒鉛期成金漫言河可塞耽奕日忘  
坐呼燈了殘局平生山水心半入瑤琴曲日來賣草書



數紙充一食貨利輕秋毫只苦飯不足三旬惜言別挽  
之能信宿蠶鹽不終厭緒言正堪續侵晨御風去盼望  
不可即茫茫水雲間頃刻疑地縮歸來舊山中猿鳴喜  
相逐傾囊發贈言顧笑若重獲看山得佳處為結數椽  
屋待我休官日會尋領松赤

與陳百一押韻擬作閨怨

孤房獨夜冷淒淒睡起眉纖偃月低數過佳期憎報鵲  
喚回好夢恠隣鷄紅顏獨壓嬌娥伴薄命翻為蕩子妻

憔悴搗衣君莫念砧聲應不到遼西

題壁間山水圖與陳百一押韻作

看山幾處載圖經飯顆猶嘲太瘦形  
久判雲林非世路慣看麋鹿上秋庭  
霜崖亂葉當書下寒谷幽蘭沁酒馨  
似憶西行山水郭別來江上幾周星

南國繁華幾代經孤城猶作虎龍形  
東山載妓閉春墅北嶺移文鎖夜庭  
朱雀無家歸燕子蒼生有恨怨寧馨  
相逢漫作新亭飲日暮歸舟幾戴星

用韻答錢邑博孔易三首

儒官散地列清流近領恩光出上州  
詩酒聊同塵外賞容顏遲惜鏡中秋  
才同伏驥堪先致史繼悲麟會晚修  
誰念庶貧藏萬卷富兒容易置書樓

官庶爭愛得閒偏烏帽青袍未老年  
靜擬詩篇酌暇日漫憐花鳥競春天  
韓公興劇盤中賞賀監狂嘲水底眠  
今日人才君獨美何如朗月映星纏

越水吳山舊品題詩聲近喜過淮西  
春便野寺衝泥到

興遶遙峰過雪躋才子瀛洲懷玉樹仙人瑯島夢丹梯  
由來孤鶴煙霄上難與羣鷄羽翼齊

東田夜坐次餘姚孫惟獻韻

晚林分火上篝燈午醉淹留坐見星樹帶鴉棲和月冷  
闌扶花睡倚春醒臨池對客看泉溜問夜停盃數漏聲  
小憩莫教牕送曙夢思剛復遶春明

徐河舟中二首

孤棹下青徐飄飄幾日餘身遙驚歲晚病怯覺舟虛午

竈全炊藥宵燈倦掩書京華縣北斗風景定何如

月暗泊舟遲河流送弱漸風波身健日冰雪歲寒時問  
路人曾識懷家僕共悲前林歸暮鳥盡解宿高枝

臨城路見雪

過徐至臨城  
駟屬滕邑

行過南徐路離家是幾時鄉寒衣漸薄計日驛爭馳老  
雪迎車舞終風直面吹狐潛應有迹鷺鳥莫啼飢

曉入東平

支病起宵征清霜下四更驛圍紅樹遠月過黑雲明北

道諳齊語東平入漢城何人愁遠戍蜀道正難行

至武城望京師再雪

北雪夜紛紛清晨客出門爐紅應自煖尊綠漫宜溫  
碧澗分平野青烟駐遠村落城饒甲第歌吹入黃昏

客夜

寒愁渾不寐城鼓四更分夜久風銷燭天陰雪打門  
鄉關千里隔宮闕九重尊惆悵絲綸舊清江有釣緡

朝見日漫題二首

京華去住漫難期旅食重看歲暮時雪後報朝趨闕遠  
城中借馬出門遲宮樓曙動庭燎合禁苑春回御柳知  
慙任裋裋遙注望舊分千室藉恩私

春明舊迹惜睽離慙謁官墀夢亦疑野客衣冠慚勝會  
隣家僕馬識朝期千牛露办渾揮霍五鳳晨光欲動移  
忽訝西行山水縣東曹列侍漫成思

新歲吟

新年初見雪消時拜舞懽同覲赤墀頒朔載分堯甲子

明禋重飭漢威儀  
銅龍漏徹鷄人報  
鐵騎班迴象路移  
帝道由來嚴正始  
從臣還擬太平詩

送何篤齋宰浦城

在京師作

東郊晴雪澗征衣  
北闕晴雲動曙暉  
建水郎官持節去  
楚江遊子及春歸  
與君得縣年俱長  
作伴還鄉願亦違  
淮海音書看不遠  
定應貧乏慰庭闈

賞蓮押韻同孫惟獻諸公賦因呈

沅芷湘蘭怨楚臣  
習池風景賞猶真  
秋吟靜愛山依閣



宴坐馴看鳥傍人  
盃沁碧荷翻  
下露衣沾紅雨濕餘春  
山公老興依稀在  
消遣流觴到座頻

九夏風光任達臣  
池亭歌舞樂全真  
戲裁蓮葉欺紈扇  
笑羨荷花惱玉人  
華屋夢回梁燕午  
金蓮歸憶禁鷺春  
由來惟賞從閑得  
記取偷閑賞亦頻

水仙綽約合為臣  
取次詩騷品鑑真  
碧葉團欺池面月  
紅粧嬌妬景中人  
緇泥不染元同幻  
剪綵常新賸借春  
更與浮萍有深愛  
憐渠踪跡往來頻

秋水紅蓮入幕臣重來風格認猶真一尊海外酬佳節  
千里花間見故人嗟送碧筒紅燭晚歌翻白苧錦箏春  
長沙亦是悲秋客猶惜湘纍寄興頻

未分飄蓬笑遠臣天涯勝會更投真莫驚歲晚同遷客  
只對花清是故人七澤秋光連玉井六郎丰采照青春  
便期東道為蓮社對景分題未厭頻

御苑風光媚近臣繁華回首夢疑真獨憐荷芰花間月  
曾照芙蓉闌下人玉屑恩沾仙掌露金錢醉憶曲江春

天涯零落多幽思何處秋山遂送頻

天台桃源

桃源舊路遠微茫問勝尋幽傍夕陽流水無媒花自落  
胡麻未熟日空長峰迴晚碧勻眉黛川弄明霞作舞裳  
却笑塵容渾未洗玉真莫認是劉郎

天姥峰次俞英之韻

天姥山高風露清下方路轉上方平花先得日開偏早  
鳥慣聞鐘宿不驚飛閣危從雲外起迴泉幽似鏡中傾

夢遊更覺雲霓遠擬借仙人鶴背輕

天津施憲副席上觀雅樂次韻二首

羽籥分曹映幕油筵間整許寄雙眸  
瑟傳清廟貽文思舞愛韶箴象德休  
伴呂亡齊終放遠離騷懷楚合兼收  
從伶莫浪移宮羽座有高人舊姓周

午筵剛見續膏油舞佾真便豁醉眸  
季子賞音心苦晚孟公留客意忘休  
歌殘雅頌猶餘韻調入伊涼亦漫收  
豈是腐儒偏好古由來先進亦從周

病起贈韓時元國醫

上國新春惜鬢絲，病回真識有良醫。  
一家兒女皆蒙力，千古岐黃幾試奇。  
賞券遠遺寧望報，同鄉數去不須期。  
却緣豎子潛難及，豈是當時漫不知。

寄東鄉大伯父

十年不過東莊宅，歲晚高堂拜白頭。  
喜到出門遙認馬，送歸攜杖近經丘。  
黃花徑裏開詩卷，紅稻香時泛酒甌。  
聞說別來强健在，幾迴天外望雲浮。

山居圖為嚴陵方氏賦

正德  
己巳

空谷遠朝市幽人心所嬰  
偃蹇烏角巾終謝冠紱紫出  
門四山曉一水相與明  
吾意聊適耳匪希高尚名  
村醪薦園果山花逞奇英  
良朋遠相求春禽鳴嚶嚶  
呼筵劇傾倒一飲輕十觥  
酣來卧崖石松風為解醒  
一醉遺萬慮百畝稱閒岷  
竹林豈狂者桃源非世情  
白日復欲暮閉門聞瀨聲  
扁舟者誰子風波勞爾生

嚴州天寧寺留別貫上人

蕭邱蘭若昔相從仙露明珠近再逢  
深院焚香迎玉節上方披闥挹金容  
重來似憶身前事久住那驚飯過鐘  
更欲遠依方外去憑君先記寺門松

上饒南巖寺漫題

寺在巖洞  
中北向

南巖萬古靈北戶向幽局緣洞逢三殿  
窺空逗七星泉疑鳴錫處石帶補天形  
不共山僧語還看是武陵

禪宮作意留來隔幾峰求洞覆簷牙  
過雲依佛面浮栖真迷白鹿駐景憶  
丹邱歲晚輸樵者長謫任此遊

五級峯

在南岩

靈山空自靈

靈山在上饒境與南岩五級峯相望山出水晶

廬嶽遠相形五級

通寥廓諸天隔杳冥風煙孤客去木葉九秋零落日南

岩靜僧閒自誦經

居山祠

祠在南岩不知何神

仙岩草樹青春夢憶前經逕入驚峰墮林迴放日停風  
波喧下界鷗鷺起長汀歸路江煙暝遊人醉未醒

贈某公歸田



南國人龍忽在田辭榮學道得長年  
懽同社日扶春醉  
閒憶衙時廢午眠

時已致仕

觀奕愛逢花外墅  
耽吟驚出

灤西篇

闕

疊前韻

樹外朱扉映水田  
風光端屬隱居年  
鶴知人意偕童舞  
花戀春光學柳眠  
當席按歌頻寄調  
分題倚和動連篇  
山靈更識留賓意  
會遣飛沅作醴泉

送友出都

郎署焚魚舊等威王家卜鳳疊恩輝湖山秋色迎烏帽  
閨閣春容上衮衣齊瑟久緣千世拙虞簫終惜賞音稀  
江東鮑謝猶餘韻張翰歸來迹已違

席上觀伶戲次韻

綺席初陳畫障迴暗除黃帽試金釵等閑面目屏間在  
取次梳粧鏡裏佳故事翻新恩怨易後觀隨衆笑顰偕  
分司此日渾多思豈有狂言雜劇俳

棄妾嘆次前韻二首

郎家憎妾少低迴棄置還同匣底釵  
恩怨難憑詞客賦  
容顏那托畫工佳春回繡閣懽猶懶  
夜靜蘭闥影與偕  
可是倚門人盡悅此身端恥學優俳

靜思那論日九迴臨鸞羞睹嫁時釵  
自緣薄命逢姑惡  
空負青春倚堦佳貌似月娥憐獨宿  
身非梁燕媿重偕  
笑顰若爾無憑準應恐傍人說是俳

觀伶舞次韻

翩如矯鶴出青田燭底低迴絕少年  
長袖欲欺風柳弄

倦眸嬌映海棠眠謾誇假髻玲瓏樣只辨纏頭錦繡篇  
共說阿書能掌舞

阿書家僮

霓裳何處送溫泉

涂賓賢按廣

驄馬出番禺青春畏簡書蓮峰迎玉節椰葉拂雕輿按  
部唐封舊觀風越吏餘鳴琴音尚遠攬轡意何如

送周國英赴寧鄉幕

好道寧鄉近清秋楚望分驛連黃蘗嶺舟過碧湘門縣  
劇才還稱官廩勢亦尊長沙多古意傳語問靈均

送俞秋官宅仁赴衡陽太守

頻年來往赤城霞  
憶過衡陽太守家  
遶屋峯巒含晚翠  
隔溪梅柳競春華  
雙龍紫誥承恩舊  
五馬朱幡入郡賒  
豈為蒼生煩賈誼  
憑傳幽意過長沙

拜陵途中有感

寺外西山翠結層  
鳴騶未動意先登  
陰雲漫欲低平野  
病眼遙能認泰陵  
曾負少年悲作客  
細尋往事得逢僧  
鍾山紫氣東南在  
秋晚凭高思正騰

出使至長沙院中次壁間詩韻

庚午年作

野燒明山雪人煙隔戍牆九州淹歲晏羣盜劇年荒  
警翼頻喧樹頰鱗自戀塘有懷憐賈誼寂寞賦臨湘

益陽院後小軒

江上兵常梗湖南歲又新小堂開傳舍高榻謝車茵  
冰雪深迴座山泉近結隣未應耽此景猶是遠行人

桃川宮秦人洞

武陵源在龍陽縣

桃川川上望仙宮峭壁重巒半古松騎馬到崖遙度水

入林迷路忽聞鐘  
花開洞裏應長好  
底過軒間暫亦逢  
當日秦人何處在  
數家茆屋隔西峯

次韻秦人洞二首

桑竹深村好自由  
眼前贏得去秦州  
雲邊野燒逢渠斷  
雪後春溪過驛流  
問路偶隨漁父入  
尋真空憶洞仙留  
湘纍千古騷魂在  
蘭芷遙堪託薦羞

隱居非是學巢由  
敲朴那當制九州  
洞裏尚憂秦慘刻  
江東今襲晉風流  
蒙恬萬里城方急  
徐市三山去已留

界亭驛次壁間韻

亂山行出見幽亭，返照高林忽易傾。  
村舍尚傳戎馬過，

炊烟初傍驛樓生。  
伏波銅柱功差立，

時總制新報平湖省賊

荆

國青苗禍已成

先是當路聚斂湖省賊由是起

正是徬徨愁不去，  
候人

鼓角報嚴程

常德院中值雪次壁間詩韻

看雪山齋起不眠，餘寒猶覺入新年。  
三分春色深無賴，



一樹梅花好自憐  
兔外陰雲連楚澤  
鷗邊朔氣隔胡天  
窮崖空谷渾蕭瑟  
煖在朱樓碧樹顛

山火

風急吹山燒煙光遠  
障空草根延木杪  
西麓走東峯  
晚照曛殘竦青天  
下火龍抵應便樵獵  
有路入深松

郵亭次韻徐用先道長

南山茂草朝生霧  
棲鵲巢邊起新路  
客子心懷履險憂  
馬頭春色空遲暮

平越院中小憩用壁間韻二首

院中高樹出城頭石路縈迴帶水流  
幾處過山剛到晚一從為客數逢秋  
川源燒沒夷首部旂幟風高漢戍樓  
立馬七盤愁望絕青煙恍惚極齊州

陌頭輕雨浥黃埃遠道春旂度嶺來  
楊老城邊逢客去吳公陂下憶花開  
繡衣持斧憐南徼畫省焚香夢北臺  
溪洞頻年猶報警候人漫自送餘盃

龍里驛次王蘭亭文濟韻口號

官閒曾喜住蓬萊瘦馬巔崖路轉迴  
破敵尚須魚鳥陣賦詩空擬鳳凰臺  
陽城不諫終當去呂誨先知更讓才  
憶別玄都春正好桃花想見一番開

至貴陽贈王蘭亭文濟

經時多病怯長途到處先供煮藥爐  
二月天涯逢故友去年花裏醉皇都  
山分夷漢憑看誌野有流亡合繪圖  
未訝南中行路險風波終日滿江湖

貴陽與徐用先道長押韻聯句別後作此寄意

南州聲望故依然，幾處還逢下榻眠。  
秋晚為期春始到，客中相憶夢常牽。  
詩人自昔多憂事，才子論功重策邊。  
不獨好辭驚絕藝，試從萬選看青錢。

和韻贈白叅將

連營刁斗互迴紮，漢將威名舊姓程。  
嶺上建牙迴小隊，幕中籌敵借長纓。  
弓戈外閫遙分制，谿洞先聲會請平。  
應惜春農勤戍守，武成遺算貴精明。

滇南喜雨次玉岡韻

畏日薄翳景薰風轉祥氛雨氣颯欲至飛蠓低作羣庭  
蕉足志喜疎點聲先聞巢鳥方拮据未陰心恒勤昆明  
擊鯨波太華山在昆明噓龍雲農憂劇公田仰茲寬一分稍  
見夏畦潤似嗅秋秔芬帝澤霈無涯雨珠非所忻邈矣  
商巖翁為霖憶書云陳詩向玉岡磨崖紀隆勛

午日偶題弔屈原

沈湘何許太淒其愁絕中流競兩旂郢俗狂猶投角黍  
騷魂醒欲扈江蘿九歌天外憂空切五日人間弔不知

賈誼少年徒解賦霸陵無事漫興悲

黔國別號玉岡用喜雨詩韻為賦此詩

玉峰出南海鬱鬱蟠靈氛逸勢驅點蒼金碧那爾羣

點蒼

金馬碧鷄皆  
滇中山名

清華入攬擷峻極訓前聞躋攀絕崇階仰

止徒殷勤瀛洲足波濤龜蒙膏雨雲眷茲元化精太璞

殊未分朝從玉岡遊春風襲蘭芬貞懷良不玼發容人

所忻古來稱高高不讓坏壤云終期覆簣初竟此為山

勲

玉岡以歷百本鎖南園司徒南園報以美人圖一  
幅玉岡舉以見示為賦一絕

鳳歷蛾眉兩關妍書中端自有嬋娟風流却憶張公子  
雪月風花看百年

客久夢中代內作二絕

梅蘂先春發山茶寒著花郎從前日去蚤晚過長沙  
南去長沙萬里程清猿啼斷鷓鴣鳴相思不識關山遠  
夢裏隨郎一處行

次韻玉岡秋興四首

江上青山秋更奇，賞懷猶隔楚天涯。  
丹楓欲障千林晚，黃鵠歸飛萬里時。  
往事燈前悲昨夢，流年暗裏惜芳姿。  
霜寒鳥雀依叢急，恠底飢鳶苦見欺。

何處秋生詩律奇，杜陵蕭索蜀江涯。  
孤舟淚迸啼猿後，三峽濤迴落木時。  
鷗鳥自飛閒不去，芙蓉雖晚故多姿。  
楚鄉雲雨還朝暮，玉風流亦漫欺。

瀘水煙銷秋日晶，關河風色慘邊情。  
年光暗惜江蘼晚，



秋鬢愁看客鏡明十道羽書聞夕警五更城角落寒聲  
季鷹自昔多幽思不為鱸魚嘆遠征

露下澄塘浸水晶芙蓉花落太無情青山近擁孤城壯  
銀漢高臨萬戶明小院松篁增爽氣誰家絃管劇商聲  
秋原莫哭誅求急薇蕨生多尚足征

出滇至平夷館適觀合溪張天益道長留一詩壁  
間見候次韻為報

社裏逢君可惠連華宗分派各江天千山雲樹蠻煙隔

五月音書驛使傳詩好總知心獨苦官閒贏得事多便  
相期共振埋輪業猶有豺狼滿道邊

至普安察院合溪道長復留一詩見候次韻

歸路依微取次尋前山日日厭登臨寒經索嶺霜林靜  
瘴入盤江晝霧深古驛荒涼驚歲晚野雲容易結秋陰  
驅車縱獵輸誰子蔓草斜坡羨獲禽

中山道中

真定府趙州  
古中山地也

二月中山道風塵障早行病思千日酒懶拂衆人情客

夜便投寺兵時喜到城使君方謝事憐爾縣官迎

贈國醫趙良臣

秋來鬢髮欲添絲笑見兒行病起時貧憶宗清多義事  
疾逢泰緩足良醫刀圭苦口收餘味蘭蕙回春得故姿  
獨有江湖憂轉癖別君無語重淒其

里人陳生善歌舊嘗識之十五年後再聞其歌因  
贈

餘音尚憶小梁州十五年前作漫遊重上朱樓歌一曲

楚天涼月在西樓

贈陳百一山人

客予家者  
數年今歸

六十看君白髮新  
江湖人笑往來頻  
機心已息  
甚常負  
談舌猶存  
食未貧  
折柳重驚南浦暮  
種桃空憶武陵春  
津亭渺渺應回首  
故國并州意更真

釣臺次韻建德舟中作

六十羊裘道路難  
九重鳳詔幾回丹  
交遊便合君臣定  
廊廟何如江海寬  
桐水一絲名節在  
雲臺千尺畫圖寒

十年塵土嚴陵夢明日扁舟過釣灘

客中

春風珂馬曲江城曾共梅花賦廣平兄弟甲科猶有恨  
縉紳文字浪知名並遊年少皆能貴今日朝廷幸自清  
萬里風塵江上客長安遙望眼偏明

港口小泊口號酌莊貳教舟中見贈

符分山縣記當年泛盡溪流笑靡然叢爵自依新赤子  
蠹魚曾出舊青編每忻芹暴因思獻見履庭霜識戒堅

貧乏只今消息在  
崔生猶藉關知傳

贈鄭山人

脈理依稀寄掌紋  
眼中奇伏定難論  
秦關百二金城在  
建業東南紫界分  
形勝未銷人共棄  
豪華欲盡石終存  
他鄉我亦嫌官拙  
還擬攜君看舊村

聞雁與陳百一作押韻

菰老蘆黃障淺池  
晚晴初喜凍雲披  
忽驚鳴雁霜中度  
似覺秋風塞上移  
胡騎漫勞矜碎柳  
棲鳥正自揀寒枝

年年惆悵金河客錯憶岐周賦鳳儀

病中喜友人王繼武遠過不能出迂口號寄意

不見王郎三十年病中看刺轉生憐吹簫橋上悲秋月  
沽酒樓前瞥野烟詩格總知猶健在鬚髯驚說已皤然  
君應問我龍鍾態約畧如君六載前

楊大用大尹見示晚年生子詩次韻答賀

賀客闕堂少白丁共誇椿樹老逾靈同時器識推楊子  
晚節芝蘭有謝庭宰邑定知陰德在承家端倪策名馨

他年會約乘軒過聽取摩空作賦聲

大用見示述懷之作因次韻

青山晚愛攜筇往華髮秋憐覽鏡知江上浮鷗馴自好  
塵中驅馬去何之閒尋謝墅園基侶病隔梁園授簡期  
坎止流行看更定豈因時態學悲絲

病中喜雨

在保定作

伏枕聞鳴雨開牕愜病心天公神叵測旱魃爾何侵  
優渥應千里斯須可萬金更祈三日止牟麥忌恒陰



題扇景

湖上生秋雨簷間滴翠陰竹西風景在別路一驚心  
江晚山色遙黃蘆雁初起漁歌何處歸聲落滄浪裏

夜至銅巖驛逢臧進士張茂才

木葉下秋山歸人傍晚寒見燈投驛遠過雨涉溪難詩  
客逢侯喜甚儔憶謝安勝遊難可繼莫負吏情閒

黃希武宅觀奕

奕關未全非開枰對夕暉過河乘勝算爭道觸危機老

馬頻憂蹶奇兵忽冒圍羊公在江上陸抗莫專威

鄉居用八弟鵠舉詩韻聊述

東風近浦送漁歌  
漸盡平溪漫綠波  
野望獨便吟處遠  
春寒猶較病來多  
閒看稚子排新局  
醉傍村翁藉軟莎  
遲暮未成投老計  
巢鳩聊寄北山阿

幽居底事動長歌  
老大心知感逝波  
花外枯桑爭日永  
鏡中華髮逗春多  
薄田遶舍差宜黍  
小徑緣村漫掩莎  
何處冥鴻飛正遠  
更看鸞鳳競巢阿

寄陳別駕汝耀

三山雁使隔年回傳道甘棠樹重培別駕風流餘薄領  
郡齋蕭散到蓬萊榕陰暗裏衙聲合荔子紅時吏俸來  
獨向樵川愁病在好音遲子笑顏開

拿口驛午憩次壁間詩韻

山行彌月未論旬又聽前灘數候人太守十年從白髮  
樵陽兩度見青春風波險欲摧心折政事書堪與淚陳  
愁絕杜陵渾太瘦謫仙詩好為傳真

壽李通判母

華筵阿母下瑤臺  
彩服仙郎試老萊  
鸞誥舊從天上降  
蟠桃新出海中來  
釀分祿米恩波注  
錦簇官衙壽域開  
記取年年延賀客  
小春時節任徘徊

次韻黃小江中秋是歲閏八月

桂香蘭馥夜交清  
心賞還同寄鶴城  
影合三人憐月色  
望遙一水憶簫聲  
病看簪綬真為祟  
忙覺玄泓久敗盟  
三五秋光吟過老  
盍簪愁咏少年行

烏石風吹晚  
遠清閨年  
羈思黯闌  
城星河際  
海涵秋影  
鸞鶴凌風  
矯夜聲重  
見月圓還  
照酒似防  
秋去更尋  
盟  
銀蟾玉兔  
無才賦起  
看黃楊遶  
砌行

贈黃北山

書工如畫  
畫如詩  
王掾當年  
固不癡  
昨日里中  
歌舞伴  
人前解唱  
北山詞

聞簫

鳳樓縹緲  
接雲霄  
環珮聲微  
夜寂寥  
弄玉由來  
有仙骨

時人莫浪學吹簫

小孫輩病起謝戴元道國醫

五十歸田計未遲西風肺氣欲蘇時  
久耽月俸遺家累稍喜秋成給藥資  
老戀山林真有癖病愁兒女豈無私  
江邊千室渾凋瘁何得從君遍問醫

秋雨

桑竹陰陰淺護村午天風雨未開門  
時從屋底窺峰頂擬過橋西看水痕  
歲事一廬憂菽麥秋租三限急鷄豚

當年曾說心勞日欲起陽公與細論

風雨歸舟次韻

客到尋常不整巾  
旋羞鷄黍供清貧  
孤舟分袂秋同迥  
獨鶴隨筇晚自馴  
曾迂雪中迴剡曲  
定從花外說秦人  
于今更憶玄真子  
細雨斜風入詠新

風雨應愁墊角巾  
相看渾笑出途貧  
知津更試輕舟捷  
諳路寧論老驥馴  
眼底風波懷共濟  
望中仙侶詫傍人  
明朝挂席期重到  
潦盡川平霽色新

送劉尚絅赴桐廬幕

送君明發遡江干  
越舶吳檣遞渺漫  
山鳥語更傾白苧  
海潮聲漫切倚蘭  
桐廬附浙元名縣  
蓮幕親民足好官  
獨有幽懷憐遠道  
夢隨飛舄落嚴灘

明妃

絕漠琵琶漢苑心  
胡雛漫聽豈知音  
自緣花貌渾難畫  
不是丹青故索金

贈國醫張從實



來往三神漫醉醒  
玉桃瑤草妬長齡  
丹砂九轉新傳訣  
道德千言舊注經  
南渡世家原共脈  
東田交誼久忘形  
煙霞僻處稀人迹  
却為逢君眼重青

贈殷道士

少年曾喜誦南華  
解指隣山說是家  
九轉自調丹竈火  
千年應見碧桃花  
青溪道士竄中鶴  
碧海仙人袖裏蛇  
不為觀鵝頻過館  
駐顏端欲乞靈砂

送黃主簿詩

仙帆西去水連雲  
彭蠡匡廬楚望分  
黃憲未妨稱世德  
趙堯終不愧斯文  
移家歲晚留鴻跡  
佐邑功存計馬羣  
好在年豐身健日  
太平林壑荷吾君

輓潘主簿詩

塵世浮榮夢不憑  
槿花先夕嘆飄零  
安仁病去曾誰誄  
邠老詩存漫托名  
五月孤嫠歸旅櫬  
千家父老泣銘旌  
東山山下流泉咽  
應為憐君帶哭聲

送朱縣丞

新來初握長官符，漫訝歸裝問去途。  
多病獨便拋簿領，遠來應自劇江湖。  
一官遲暮馮唐傳，孤棹夷猶范蠡圖。  
吾老東田慵卧在，北門供帳有人無。

題劉大叅函關圖

卯金公子托金蘭，惜別秦川雪滿山。  
何處思君天萬里，祇應清夢到函關。

題美人圖

幽牕誰熱返魂香，恍惚仙姿出洞房。  
畫裏呼名渾欲語，

琴中傳意故成狂，愁顰西子憐傾國。  
心謝東隣絕踰牆，却恨丹青枉圖畫。  
燕脂山外泣王嬌。

咏牡丹用唐人韻

沉香亭路到無因，悵望東風欲度春。  
穠艷重逢木芍藥，麗詞應泣謫仙人。  
粧臺醉浥葡萄露，錦襪香留瑞腦塵。  
不用凭欄傷往事，玉環元只是前身。

浪蕊浮花謝俗塵，洛陽移種獨饒春。  
雨中淡泊同幽客，天與繁華鬪麗人。  
開向驪宮驚羯鼓，落從金谷印香塵。

東君珍重非韓令十二雕闌許托身

題徐都司宅上海棠

雨膩煙霏曉夢酣東風扶醉倚危欄  
遊人遙隔雕牆外桃李成林欲認難

西園春曉

二月東風曉逗寒西園剛借標梅看  
幽人興落春華外不奈新紅上竹闌

秋晚過堯卿弟莊

白髮看吾弟兒童共昔年謝家偏玉樹何氏勝林泉病  
起能招客秋深為放船吾衰如杜老吟罷意茫然

登絅卿弟東樓

南風送花雨攜客上東樓遲景茲多暇微涼兼似秋雲  
空吳望濶草綠楚騷留眷此連枝會高吟愧昔遊

題醉學士

天上歸來老集英醉中歲月漫崢嶸先生不是高陽侶  
自笑三閭說獨醒

別友人

殘燈明曙鼓晴鐸報春城月出銀河隱林開鳥雀鳴故人憐易別舊事笑難憑寄語今年去休忘管鮑情

贈郭生

郭郎人盡笑髮白不憂貧賣藥來通市分錢與餓人洞簫飛月夜郢曲度陽春有客渾曾識休論見面新

聽琴

嵇康昔疎放孤桐托奇音陶潛自曠達空撫無弦琴君

懷廣陵曲我愛柴桑吟那能悅俚耳所貴崇古心

喜張處士枉過次韻答意

詩客春殘病未興白頭漫興祇如曾江離彌望空憐晚  
旬麥緣貧稍藉登閑伴海鷗浮浪蕩醉過隣叟對鬚髥  
幽情更愛玄真子漁父詞工和未能

別王南原憲副

相送曹門道離情祇自憐西風吹汴水南客問吳船佩  
劍明秋日鳴笳入暮天遙知彩衣樂猶及桂花前



次韻答丁茂才有道

丁度青雲器窮年對古書文辭殊秀雅風骨宛蕭疎  
賞合涓金重音稀郢曲餘吾衰慚狗監徒爾識相如

春日集八弟鵲舉園用韻二首

春遊便野服翻覺厭鳴琚緩步新開徑閒看近得書  
何心嬰世網有客待公車好在菟裘老無勞更卜居

池芟亭新蓋風篁戛素琚清標吾獨愛疎節客曾書  
鷄黍招同社兒童候小車春園幽勝在差擬浣花居

放舟疊前韻書綢鄉弟扇頭

春水纔容棹松風暗學琚酒從彭澤醉詩倩阿咸書已  
乞仙人藥深辭長者車那知林薄外亦有老農居

松鶴軒贈處士蔡良翰

西軒棲隱處松鶴與人閒素節終相保冥飛豈易扳瘦  
寧知衛祿清不受秦銜子和孫枝秀還渠藉好顏

輓詩

凱風悲棘心護夢杳春深陟屺迷長望鳴琴眷好音膽

九劬柳母羊棗泣曾參寵渥年來下哀榮出華陰

竹齋為劉尚絅題

美人居傍竹西亭冰玉相看眼更青  
伺鳳翔鸞渾未解軒間試亦鼓湘靈

雪夜與鵬舉弟過禪房

夜久真消雪水茶聽琴觀奕共燈花  
當年幾許留詩在不向山僧問碧紗

堂上曾分佛供茶憶僧遙問木蘭花  
相逢更愛毘盧煖

笑煞塵途抗帽紗

東樓夜集

得銀字絃  
卿弟宅

秋盡江南訪隱淪  
江南風物總宜人  
洞庭橘綴山頭錦  
笠澤魚拋水面銀

詞

壽沐國公詞

今年冬十月廿三日玉岡先生逢其初度者適三十年而予萬里來滇得稱觴致詞為壽亦一勝會也

願聚合不可常而王岡仁靜宜老壽後三十年子東  
西南北未可期也而年年生日縱令一歌此詞公庶  
幾憮然興懷猶如東田之在座耳詞之調為金菊對  
芙蓉

黃綬庭槐碧收營柳朝來畫戟霜凝更煙霏瑞腦日麗  
雕甍華階鶴舞南飛曲降阿母青鳥低鳴又何須用金  
貂換酒銀甲彈箏相共祝取長生記當年此日光岳  
鍾靈喜干戈將印不負蜚英舊家燕子歸來慣見滇海

萬里波澄羣仙道是人間元老天上長庚

送朱思齋詞并序代作

伏以國家惟用賢以養民守令必親下而獲上雖豪傑之士不待人興願公輔之階亦由譽召恭惟寅長朱老先生大人閣下天才挺異人望歸隆世承折檻之風夙績考亭之緒蜚英兩制伯仲聯芳出宰一麾江淮婉美下車伊始游刃有餘崇儒儲歌鹿之需閔農切書蝗之警均田之議方劇而持志益堅行水之

智既殫而成功永賴防危則重投石超距之賞化俗  
則嚴珥筆教訟之刑誠信下孚聲華上達永櫟之操  
允出臺評夏楚之施奚嫌輿議某等叨居僚貳與有  
榮光睹薦剡之屢騰知徵車之孔邇久陪宴笑忻聞  
三月之謠宿荷悵懼失二天之庇敬裁鄙製用作  
後徵詞之調為喜遷鶯

琴堂新霽正涼入薰絃潛消殘暑帝日中天郎星分野  
望極碧穹如洗蒲境謳歌滿路潘縣春風桃李相看取

問東君政績前賢傳裏剛喜應祇是栢府嚴霜解作花  
封雨竹馬迎來花驄催發江郭放教容與屈指時易  
即棠樹垂陰曾幾頻向說繡衣行部爭留好語

贊


雲安胡君遺像贊

湯溪胡君以邑博卒于官其友東田子題其像曰

三丘崔嵬維君之姿雙溪漣漪維君之辭肆仁以靜亦  
淵以思何實修而譽卑嗟負大而小施賞音難逢值數



或奇懷哉雲安今其已而嗚呼噫嘻道崇縛紲守尚谷  
谿穉肅蕃儀雁門鄙規融獨沮膺壤遭孔嗤胡殤匪彭  
胡陵不夷繫君陶鑄無私躍冶多乎顏化弓裘罔戮過  
庭嘉乎鯉趨典刑猶存成幾來茲



東田遺稿卷上